



partii naleraq

UPA2016/69

Inissianik attartortitsisarneq pillugu Inatsisartut peqqussutaata nr. 2, 12. maj 2005-imeersup UPA 2017-mi allanngortinneqarnissaa pillugu Naalakkersuisut suliniuteqaqqullugit inatsisartut aalajangiiffigisassaattut siunnersuut. Taamaaliornikkut atorfimmut atatillugu inigisap sivikinnerpaamik ukiuni tallimani attartoreerneratigut attartortup naliginnaasumik attartukkatut inigilersinnaaqullugu.

(Inatsisartunut ilaasortaq Anthon Frederiksen, Partii Naleraq)

Nunatsinni angerlarsimaffeqariaaserput ukiorpassuarni equngasumik tunngaveqartitaanerata kingunerisaanik amerlasoorpassuit, minnerunngitsumik maani Nuummi, atorfissarsiukkajuttarput inissiamik ilaatigut neqoroornertaqarnera pissutigalugu, ilaatigullu aamma tamanna tunngaveqarpoq ukiorpassuannulersuni nunatta avataaniit tikisitsisarnerujussuatta kinguneranik. Massakut agguaqatigiisillugu tikisitaq atorfilittaq nunatsinniittarpoq qaammatini 13-ni, tassa ukioq ataaseq qaammallu ataaseq, tamannalu toqqammavigalugu inissiat amerlasoorpapiussuit suliffimmut atatillugu taarseraattorujummik inigineqartarlutik. Inissaaleqinerullu ilaatigut kingunerinik aamma maani nunaqavissut sulisussarsiornerminnut atatillugu inissaqartitsineq avaqqukkuminaatsittartorujuullugu.

Taamaakkaluartorli, minnerunngitsumik nunaqavissut akornanni sulisut aalajaallutik ukiorpaalunni suliffimminnut tunniusimallutik sulisarput, taakkulu tunngaviugunarput siunnersuuteqartup Anthon Frederiksen, Partii Naleraqmeersup siunnersuuteqarneranut.

Tamannalu nangillugu imatut siunnersuut oqaaseqarfigissuarput.

Siunnersuuteqartup tunngavilersuinermini aallaavigaa inatsisip atuutereersup sakkukillilaarnissaa kiffaanngissuseqarnerulernissaannik kinguneqartumik. Qularnanngittumillu aamma tamanna kingunerisussaavaa sulisut amerlasuut namminerisaminnik piumassuseqarnerullutik naammassisaqarnerusinnaanngorlutik suliffimmini sulisinnaalernissaat. Aammalu pisortani atorfillit kiffaanngissuseqarnerullutik inigisamut pituttorsimavallaaratik - namminersortunngorsinnaanerat imaluunniit suliffimmut allamut nuussinnaanerat ammaffigineqarnerusariaqarmat - suliffimmi nuannarinngikkaanni inigisap annaaneqarnissaanna pillugu suliffik tigumminiaannarneqaruni - suliffimmi naammassisaqarsinnaanermut aamma tamanna sunniuteqarnerlussinnaasoq takorloorneqarsinnaavoq .

Ingerlatsinitsinni aqqissuusseqqittariaqaavissorpugut sutigut tamatigut aamma qanoq illoqariaaseqarnitsinnut taamaappoq, uagullu qitiusumiit periarfissiinissamik aqutissiuussisussaangaluarluta allorianngittoortarnitta ilaasa makku ajornartorsiutit pilersinneqartarneranik kingunillit. Tamakkulu qaffattuassapput pimoorullugu iliuuseqalinngikkutta. Nunat avannarliit atugarissaarnerunissamik nunarsuarmioqatitsinnik maligassiuilluartutut nalilerneqartarput, assiginngittunillu tunngaveqarlutik tamanna angunikuuat, allaat sulisartukkormiut nunani avannarlerni nammineq illugisaminnik illutaarnermik kingunerisaanik, akilersuisullutik naafferarnerullu kingunerisaanik aningaasaqarnikkut periarfissaginneruleriartornikuullutik. Tassalu ilaatigut tamanna nunatsinni anguniagassatta ilaat – aningaaserivik illusinissamut atorniarnissamik periarfissiisoq nammineerluta pigisarput, tamakkuli angutserlugit makku siunnersuutit inuiaqatigiit iluminni oqilisaanermik kinguneqartussat qularata taparserlugit aqutissiuussisariaqarpugut.

Taamaattumik uagut tungitsinniik tamanna anersaaralugu una siunnersuut tamakkiisumik taparserparput aappassaaneerpeqannginnerminilu ataatsimiititaliami sukumiisumik suliarineqareerluni inatsisartuni naammassineqarnissaa innersuussutigalugu.

Qujanaq